



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 3

Italian Open: Djokovic quarter finals-i iogo; Alcaraz tsükogo

Karnataka nung 'Talibanisation' tenzükogo: Nalin Kumar

VOL. XX NO. 214 (ADOK 214) DIMAPUR RASEMNÜ (WEDNESDAY)

MONUPII (MAY) 17, 2023

₹ 5.00

NLA Rules Committee senden athir

Dimapur, May 16, 2023 (TYO): Nagaland Legislative Assembly Speaker-i May 18, 2023 nü Rules Committee senden ka amentsü jatepba athir ta Assembly

Secretariat-i metetdaksüogo. Tripura Legislative Assembly Speaker-i Nagaland semdangtsü aliba ajanga iba senden thinener ta parnokshi.

NLA Introductory-cum-Adoption Meeting amentsü

Dimapur, May 16, 2023 (TYO): Public Undertakings, Nagaland Legislative Assembly Chairman Imkong L. Imchen-i Committee tasen tentetba indang senden ka amentsü jatepogo.

Introductory-cum-Adoption Meeting alitsü ta pai metetdaksü. Iba senden nung Committee züngsem ajak adentsü mepishir aser maparen meinyaki alibatem den taküm atema work programme yanglutsü ta paisa ashi.

May 17, 2023 nü Assembly Committee Room nung

Kohima nung ILP aser ozüing alema arurtem mita ao

Dimapur, May 16, 2023 (TYO): May 16, 2023 nü Kohima aser temeket nung Inner Line Permit (ILP) verification drive ka agiogo.

lateta aliba ama senchi chiogo. Kohima nung ILP defaulters 325 putet aser parnok indang kulikaket ajak jangjatepa liasü. Iba atema aibelenertem dang nungi Rs 1,20,000 senchi chiogo aser ibaji sorkar senpongi yoktsü.

District Administration aser Police meyoktepa telok pungi ozüing alema arurtem aser ILP mabenertem putettsü atema iba mapa inyak.

ILP atema tentetba Special Task Force ajanga mapang shia ozüing alema arurtem aser ILP defaulters mita aotsü. Kohima Deputy Commissioner-i tuyuba ama iba mapa inyak.

Tanü ILP mapang süidoker alirtem aser kar valid pass malirtem putet aser Bengal Eastern Frontier Regulation (BEFR), 1873 nung

Northeast nung tzüinglu kanga arutsü

Guwahati, May 16, 2023 (Agencies): Northeast nung tan hopta tzüinglu kanga arutsü ta India Meteorological Department (IMD)-i metetdaksü.

Külen, Nagaland, Manipur, Mizoram aser Tripura nung May 19 tashi tzüinglu arutsü ta parnokisa ashi. IMD-i May 16 atema Arunachal Pradesh nung yellow watch sangoktsü.

May 16 nungi May 20 tashi Northeast nung tzüinglu kanga arutsü. May 16 nü Arunachal Pradesh nung aser May 16 nungi 20 tsüingda Assam o Meghalaya nung tzüinglu kanga arutsü ta IMD-

Parnokisa tan hopta tatem tashi Assam, Meghalaya, Nagaland, Manipur, Mizoram aser Tripura nunga yellow watch sangoktsüogo.

Mkg nung 'Naga plebiscite aser yimden temeten' indang shisa lemsatep

Mokokchung, May 16, 2023 (TYO): May 16 ya Naga nüchiso asoshi meyongnem agiba koba dang 'plebiscite' ta ajar, iba anogo bilemteta amungba den repsema "Naga plebiscite aser yimden temeten" onük dak sentakba nung shisa lemsa sentong ka yangi Hotel Metsüben, Mokokchung nung kaogo.

liasi. Aji saka, lia arudang 1880 nung British nungeri Naga nungeri litsü anululen tsütsü tera agiatok, aji sür Assam kübok "the Naga Hills" ta sür district ka aküm.

Iba sentong ya Mokokchung nungi temulunger tebu teti aser senso kar lungjemer lanurtem nem "Naga Plebiscite" agiba indang angatetdaksütsü nükjidong yur ayongzükba lir. Tanü iba sentong nung Senior Advocate, tsürabur Takuyaba aser Dr. Toshi Echa nati tongti shilem agia tagitsü shisatsü aika lemsatep.

1929 küm 'Naga Hills' nung alirtemi 'British Parliamentary Commission' nem tezüluba ka agütsü, aser ibaji British sorkari India toktsütsüsa kümra, Naga nungeri akhi koda liasü, yamaji dang toktsütsü iba tezüluba nungji shia liasü, ta pai ashi. Iyongji, 1935 nung British Parliament nung Govt. of India Act kübok ozüing ka yanglua 'Naga Hills' ji "Excluded Area" kümdaksü aser yangji British ozüing agi malen saka Assam governor nem dang Naga Hills madak yimsü asütsü ozüingtem (regulations) yanglutsü nungloksü, ta paisa shisem.

Tsürabur Sr. Advocate, Takuyaba-i jembidang, plebiscite agiba ya tanga kecha atema masü, saka Naga nungeri shinga kübok melii akhi ama pei sasa yimsü süa alitsü (sovereignty) atema 16th May, 1951 nü agi aser ibaji Naga National Council (NNC)-i achayanga agi aser iba tashi (mandate)-ji NNC ket nung dang lir, ta ashi.

India nungeri nüchiso anguba mapang shirnoksa India union nung adentsü mulunger, külemi lungjemer Indian Union akümsü 1947 nung Indian Constituent Assembly ajanga bangzüng ka renem. Iba bangzüng nung ajemdaker, Naga nungeri Indian Union nung adentsü memulung aser Naga nungeri jilia 14th August, 1947 nung nüchiso sangdong aser ibaji linük tebu Mahatma Gandhi-ia Naga nungeri lenir den Delhi nung July 1947

Akhi nungi Naga nungeri shinga kübok lia maru aser linük ka ama mezünyongni liasü aser ibaji Tsüingremi agütsüba lir. Yim ajak pei pei meten kibur kümer

Rozgar Mela: Nagaland nungi nisung 52-i appointment letters angu



Dimapur, May 16, 2023 (TYO): Monglubarü Minister of State for Social Justice and Empowerment, Pratima Bhoumik-i Nagaland nung nisung 52 nem Appointment Letters agütsüogo.

"Sorkari shilem lemsar lanurtem nem mapa agütsütsü ta yaküm Prime Minister Narendra Modi-i ashi. 2047 tashi nung India ya 'atmanirbhar' aser 'vishwaguru' kümdaksütsü atema PM Modi-i lanurtem nem mapa agütsütsü tenangzükba lir" Union Minister-isa metetdaksü.

shilem agir. Lanurtemi pei indang startups tenzükogo aser tangar nem mapa agütsür, ta laisa metetdaksü.

Dimapur nung aliba Imliyanger Memorial Centre (IMC) Hall nung Rozgar Mela indang 5 buba Edition sentong nung lai Appointment Letters agütsü.

"Iba alizüing atongtsü atema lanurtemi meranga inyaksüla aser linük yangerba nung shilem agütsü" ta laisa ashi.

PM Modi-i sorkar ketdangtsütsü tenzükba sülen Northeast kanga renlokogo. Road infrastructure, rail connectivity aser tanga terenlok mapa jenti inyakogo. Terenlok talila aliba ajanga lanurtemi mapa teimba angütsü, ta Pratima-isa ashi.

Iba sentong nung Assam Rifles dena ministry 6 nung nisung 321 nem appointment letters agütsü aser parnok rongnung tetsür 67 dena lir.

"India nüjiso ngur küm 76 buba nung Nagaland nung tetsür MLA ana shimogo. PM Modi lanurtem sorkar mapa ajanga tejakleni aotsü majungshir. Pai lanurtem startups ajanga pei sasa noktaksü aser tarutsü yangertsü ayongzükba" ta Pratima Bhoumik-isa ashi.

"Mapa angurtemi Karmayogi Prarambh ajanga training agitetsü" ta Postmaster General, NE-II region, North East Postal Circle, Som Kamei-i ashi.

"Tanü anogo ya kanga dang tongtipang kechiyong Northeast nung Assam aser Sikkim dak alaka nisung 321 mapa nung shimokba shidi agütsür. Nisung 321 rongnung tetsür 67 dena lir kechiyong PM Modi-i tetsür tashi itdaksütsü atema tongti süa inyaker" ta Pratima Bhoumik-i ashi.

2016 nung linük nung startups 10000 teküpok liasü saka 2023 tashi nung startups 90000 tema kümogo. Item ajanga lanurtemi linük yangerba nung

Karmayogi Prarambh ya sorkar department balala nung mapa angurtem atema online orientation course ka lir, ta paisa ashi.

Rozgar Mela indang 5 buba Edition sentong ya Office of the Postmaster General, Northeast Region-II, Dimapur ajanga ayongzükba agi.

Nokachari-Alongtaki-Chungliyimsen (Old British Road) nungi bener atu, ta ashi.

Plebiscite maparen dak sentakba nung senotsü intokba ajakji Nokchira (Longkhum)-i tenla, idangji Mokokchung Sub-Division dang liasü, iba mapang pa ya business takok ngua inyaker ka liasü, pai senpak 30,000/- (thirty thousand) tenla. Nokchirar kidangji NNC President AZ Phizo atema taktang balaka renemtsü aser tanü iba taktangji lir, ta angazükba, ta paisa shisem.

Plebiscite document-temji tanaben nungdak adokra ta sür Phizo-i ibaji microfilm nung yanglua satellite nung inoka ayu. "18th Sept, 1987 England nung pa ajurtepdang ni item kakettemji nguogo aser kü ket nung photo copy lir", ta Dr. Toshi-i Phizo tena ajurtepdang sensaksemba kar lemsatep.

Tanü iba sentong nung tsürabur Lanukaba (Aliba) onir liasü, iba den Nagaland University nung tesayur aser Human rights activist, Dr. Lanu-ia libuyimpur temeten indang teratet shia liasü. Mokokchung aser temeket tesem balala nungi tebu teti, teshimtet senso aser osangbenertem arua shilem agia aden.

loktiliba aser sobaliba tsütsü parnok sasa satematemata telemtetba agia bener otettsü temeten kar, ta paisa ashi.

Anungji, Naga nungeri nüchiso angütsütsüba temeten lir, kechiyong Naga nungeri mezünyongni tangar kübok maliasü, Indian Constituent Assembly bangzüng No. 2 agia metenja lir, 14th Aug, 1947 nü Naga nüchiso sangdongba, 16th May, 1951 nung plebiscite agiba aser UN declaration on the rights of Indigenous peoples 2007, item kulitem ajanga Naga nungeri nüchiso angütsü tetemtsü aser temeten lir, ta paisa jangjajangja metetdaksü.

Naga lima ya India nungeri rakzükba lir, anungji, shinga telok dang nüchiso akanger masü saka Naga nüchiso yimaker nungi noktangtsü meranger dang, ta paisa shisem.

Dr. Toshi Echa-i jembidang, Naga yimden otsü tetenzük nungi plebiscite agiba anogo tashi tatongi rateta ashi. Plebiscite dak sentakba maparen ya NNC Vice President, Imkongmeren (Longkhum)-i renema, anepalua aser achayanga Jorhat nungi bener atu. Pai pa meyang Vellys Jeep tenla aser driver Takaneken teyari ajanga plebiscite kakettemji

Dimapur Government College nung state level workshop agi



Dimapur, Monupii/May 16 (TYO): Dimapur Government College nung May 16, 2023 nü "Office Practices and Library Management: Requirements for NAAC Assessment" nungja agütsür State Level Workshop ka agia liasü.

Iba sentong ya Dimapur Government College aser Unity College, Dimapur indang Internal Quality Assessment Cells (IQAC) lungjemer Professional and Development Programme for Non-Teaching Staff kübok ayongzüka liasü, kong state tesem balala nung aliba college 24 nungi non-teaching staff tem dena liasü.

Iba workshop nung session asem liasü. Mezüngbuba session nung Dr. Vinyuhu Lhoungu, Coordinator, IQAC, DGC menden liasü aser shisalen sayur Niketu Siam,

Senior Librarian, DGC liasü, shibai "General Library Operations" onük nung ajemdaker o jembia liasü.

Tanabuba session nung Dr. Maongkala Longchar, Assistant Professor aser Member IQAC, DGC menden liasü. Iba session nung shisalen sayur ya Ashok Kumar Jain, Senior Head Assistant, DGC liasü aser pai "Office Procedure and Management" onük nung jembia liasü.

Tasembuba session nung Dr. Temjenwabang, Assistant Professor aser Member, IQAC, Unity College, Dimapur menden liasü aser shisalen sayur Martha T., Coordinator, IQAC of St. Xavier College, Jalukie, Peren ajanga "Finance and Accounts" onük nung jembia liasü.

Iba workshop nung tezülur

Dr. Tabussum Khan, Asst. Prof. aser Member IQAC, Unity College; Azungla Imsong, Asst. Prof. aser Member IQAC, Unity College aser Selina Walling, Asst. Prof. aser Member IQAC, DGC liasü.

Iba sentong tenzüka jembidang DGC indang principal Professor Sanjay Sharma-i office junga anepalutsü aser library junga ketdang asütsü atema temolung agüja jembia liasü.

Iba amala workshop ya non-teaching staff tem atema kisüing masü saka higher educational institutions indang tesayur aser administrator atema nungdaka liasü, ta pai ashi.

Iba workshop takok ngua ayongzüktetba atema pa tenüngsang agüja liasü.

Dept. of Technical Education ajanga NEE-2023 atema metetdaksür

Dimapur, Monupii/May 16 (TYO): NERIST Entrance Examination (NEE-I, II, III) - 2023 atema apply süa aliba candidates ajak dang sangdong ka nung ashiba agi, NERIST authority ajanga NEE-2023 agitsü anogo melenshiogo. NE-II & III ya 24/06/2023

(Honibar) anepdang 10:00 ako nungi anüngdang 1:00 ako tashi agitsü. NEE-I ya 25/06/2023 (Deobar) anepdang 10:00 ako nungi tenzüka anüngdang 1:00 ako tashi agitsü.

Iba dak sendakba nung Candidate ajak dang 14.06.2023 nungi tenzüka

updated Admit Cards tem website www.nerist.ac.in mesüra www.needonline.ac.in nungi download asütsü metetdaksü.

Maneni candidate temi mapang shia institute indang website reprangtsü ajungshir, ta sangdong ajangasa ashi.

Police aser kaketshir temi mürekmeju sentong nung shilem agi



Dimapur, Monupii/May 16 (TYO): KAM cleanliness drive noklem tanabuba PHQ junction, Kohima nung May 16, 2023 nü ayongzüka liasü, kong kaketshir aser volunteers temi plastic jana benden aser jana bendanga liasü.

KAM kübok mürekmejuba sentong ayongzüka nung shilem ka ama iba sentong nung police personnel noklang aika den Ministers' Hill Baptist Higher Secondary School aser Dainty Buds School nungi kaketshirtem aser Jail Colony nungi NPP lanurtemi shilem agia liasü.

Iba sentong nung jembidang, yimti müreka ayutsü ya nübur

ajak mapa lir aser iba ama sentong ya tanü tatem masü saka ita shia agitsüla, ta MLA Dr Tseilhoutuo Rhütso-i ashi.

Kaketshir temi shilem agiba asoshi pelaba lemsatet dang Dr Rhütso-i kaket rejutem dang ita shia iba ama mürekmejuba mapa inyaksü aser Nagaland müreka ayutsü asoshi nübur nem awareness agütsür ka-ka akumtsü ayongzüka liasü.

Additional DGP Nagaland, Sandeep M. Tamgade-i Kohima müreka aser tashidak ajak nungi jenbua ayutsü ayongzüker aser lipajen müreka ayutsü asoshi yimya sübatsü ayongzüka liasü.

Madhya Pradesh kübok

Nataram yimtsüing nungi tesem balala sema cycle nung kisüing senzür aser tenemi atur arishi küm 24 tain Aasha Malviya, shiba Hombarnü Kohima tonga arua liasü, la iba KAM cleanliness drive nung shilem agia liasü.

Aasha-i iba sentong ya November 1, 2022 nü tenzüker aser state 28 sema kilometre 25000 jajatsü nükjidong lir aser iba mapang "Women Safety and Women Empowerment" indang awareness agüja senzür.

Iba sentong nung Mengu Suokhrie menden liasü aser Managing Director, KOHIMAS, Dr. Keneilhoulie Medom-ia o tatsüka jembia liasü.

Ao Senden-i Mokokchung nung Free Health Camp ayongzüksü

Dimapur, Monupii/May 16 (TYO): Ao Senden tawapangba kübok North-East Health Services Guwahati ajanga Apollo Hospitals Guwahati den lungjemer May 20, 2023 anepdang 9:00 ako nungi tenzüka Imkongliba Memorial District Hospital, Mokokchung nung Free Health Camp and Awareness programme ka ayongzüksü.

Iba health camp mapang Guwahati nungi Neurosurgery, Cardiology, Gastroenterology, Pediatric aser Medicine (specialist in Critical care) indang specialist doctor tem ajurutetsü.

NE Health Services Pvt Ltd

ya Guwahati nung amenoka aliba organisation ka lir, aser parnoki Northeast tesem balala nungi temang anepalutsü asoshi Guwahati-i arurtem nem services balala agütsür.

Iba organisation ya Department of Health and Family Welfare, Govt. of Nagaland-ia approve süa lir. Parnoki Transportation, achi-ajemtsü aser anenzükdak, Doctors appointments, Report aser Sample bendenba, yimti sema anir senzüba amala service tem agütsür.

Iba sentong nung ajak arua angati temang reprangtsü jaoker, ta Ao Senden ajanga sangdong ka nung ashi.

Minister Kenye-i Power Department ketdangsürtem ajuru



Kohima, Monupii/May 16 (TYO): Minister, Power & Parliamentary Affairs, KG Kenye-i Mongulbarnü Hotel Japfu, Kohima nung Power Department indang ketdangsürtem den senden ka mena liasü.

Iba mapang power supply agütsüba, revenue bendenba, organisational restructuring, nübu agi anüngba aser state nung power generation ajaklen renloktsü asoshi inyakba mapang tetsükdaksü balala ajuruba indang kanga junga jembia liasü.

State nung power sector asendenshitsu asoshi mera agiyonga aodang ketdangsür, field staff aser stakeholders ajak nungi tashi angateptsü imlar, ta Kenye-i ashi.

Tetsükdaksü aser tayongzüka jenti liaka nübur tenzüka wadang nung department-i anibelem mesasai inyakba asoshi Minister Kenye-i tenüngsang agütsü aser taruba küm pongu tsüngta pei sasa pei peria power adokdaksüba state ka akumtsü asoshi maneni meranga inyaksü ayongzüka liasü.

State nung Assam Rifles temi sentong balala ayongzüker

Dimapur, Monupii/May 16 (TYO): HQ IGAR (N) kübok Assam Rifles temi Tening, Peren nung May 15, 2023 nü Security Meet ka ayongzüka liasü. Iba senden nung yimtsüing ketdangsürtem (GBs, secretary & village council züngsemtem) 27 aser police ana dena liasü.

Iba tesem nung security dak sendakba jembishinütsü aser tarutsü nung lendong timtem majurutsü atema osangtsüsang lemsateptsü, amalitep akatsü

asur Security Forces aser nübur tsüngta tangatetep alitsü nükjidong nung iba sentong ya ayongzüka liasü.

Maneni World Orthodontic Health Day nungtem nung HQ IGAR (N) kübok Assam Rifles temi Government Higher Secondary School, Tuensang nung Dental health lecture ayongzüker aser Tuensang jila nung awareness agüja yimtung süa jaja liasü.

Iba sentong nung kaketshir 389 dena liasü.

Lumia sarasademtsü ayongzüker

Dimapur, Monupii/May 16 (TYO): Mapang arur aser aor. Putu tasen arur aser aor. Lenir balala arur aser aor. Yamaji na aser nia aru aser aotsü. Ibai khen atema dang. Tasüngdangbaji, asenoki tamakok ajurur aotsü na?

Repranga ataba kisüing asenok mekumzüksü. Ibaji ajanga tajung kecha bener marutsü, saka Tsüngrem daka amanga Pai molungba nung lira asen kumzüksü.

Asenoki maginüba tensa aseni melenshitsu, aji mesüra teti alitsü. Tang Manipur tensa aser Indo-Naga ken o nung tamang aser mapa nungdaker.

Anungji CNC ajanga CHq Church, Hebron nung May 19, 2023 nü lumia sarasademba sentong ka ayongzüker, ta General Secretary CNC, Rev. Seksim Kasar ajanga sangdong ka nung ashi.

Anema aliba NSCN züngsem ajak dang iba lumia sarasadem sentong nung adentsü aser Tsüngrem matsüngdang külemi apudaksü ayongzüker. Kasa anogo Army aser Region Churches ajunga nung lumia sarasademtsü ayongzüker.

Sarasadem onük - Manipur tensa aser Indo-Naga ken o tem alitsü, ta sangdong ajangasa ashi.



Chennai nung Rojgaar Mela sentong agiba mapang appointment shiti agütsüba sülen mapa nung aniokertem den Union Minister Nirmala Sitharaman tangokba noksa nung angur.

Parliament ki tasenba May tatemlen semzüksü akok

New Delhi, Monupii/May 16 (Agencies): Ato Kilonser Narendra Modi-i Parliament ki tasenba yakta semzüksütsü akok, koba Delhi kübok Lutyens tesem nung yangludat.

Iba ki ya Central Vista Redevelopment Project nung shilem ka ama yangludat. Parliament ki tasenba ya iba ita tatemlen semzüksü imlar, koba National Democratic Alliance (NDA)-i sorkar kümteter küm teku ajungba mapang ka asütsü, ta ken o jangja alirtemi metetdaksü.

Ita ka tejakdang Ato Kilonser Modi-i iba ki semdanga asadangogo. Lok Sabha speaker Om Birla den külemi

Modi-i Parliament tasenba semdanga maparen balala inyaka aliba asadangogo. Ato Kilonser-i Parliament House anaprongla nung facility balala yanglua aliba asadanga den mapa inyakertem aser ketdangsürtem den sensaksema liasü, ta source-isa ashi.

Parliament ki tasenba yanglutsü atema Ato Kilonser-i 2020 küm nungshilong azüngja liasü. 2021 küm September ita pai iba ki tasenba semdanga mapa inyakertem den sensaksema liasü.

Nüngshilong azüngtsüba mapang Modi-i, "Parliament ki tasen ka yanglutsü asoshi küm aika nungi nungdaka aruogo.

Aso 21buba nung jajaba India-i Parliament ki tasen ka nungdaker. Ki tenjenbai linük nungdakra peridaksüogio aser Parliament ki tasenba yagi linük tejangraba ataloktsütsü," ta ashi.

Parliament ki tasenba ya 64,500 square metre lir aser iba ya sen crore 20,000 alang Central Vista project nung shilem ka lir. Parliament ki tasenba ya sen crore 971 intoka yanglutsü asatetogo. Iba ki ya menoknok agi meraksatsütetsüsa yangludat aser ki yangluba nung teka amoka mapang inyaker 2,000 aser tanga inyakyim nung shilem agir 9000 lir. Parliament ki tasenba nung MP 1200 shi asemtsü.

Küm 32 sülen Mirwaiz Farooq tepseter ana puogo

New Delhi, Monupii/May 16 (Agencies): Jammu and Kashmir police-i kiralongrar ana puogo, shirnok Mirwaiz Farooq tepsetba sülen jenshia senzüa liasü. Aija alisang ana ya Nepal aser Pakistan nung atsükoka liasü.

Osangbener den sensaksemba mapang Special DG CID Jammu and Kashmir RR Swain-i, State Investigation Unit (SIA)-i bushisüngdang takok ngua benoka inyaka Hizbul-Mujahideen den sendaktepa alir ana puogo. Pua aliba kiralongrar ana ya Srinagar nung Azad Basti Natipora nungi Ajmal Khan aser Danderkhaw Batamalo, Srinagar nungi Zahoor Ahmad

Bhatt a jangjaogo, ta ashi. Ketdangsürtemi ashiba agi, 1990 küm May 21 nü Mirwaiz tepsetba sülen tena ya ka Nepal nung aser ka Pakistan nung atsükoka liasü. "Tena Nepal aser Pakistan kübok tesem balala nung atsükshishia senzür küm ishika tejakdang Kashmir-i aru. Tena police nungi jenshia address aser talidak ki melenshia lia liasü," ta Swain-i ashi.

Police sangdong ajanga ashiba agi, tena ya CBI ken o ka nung aija lir. Tena Delhi nung TADA court ka nung o bendangtsü. Temetetsükaji aija alir parnok pongu rongnung ka tenüng agi Ayub Dar bo obendangogo aser tang

tepuokdak taküm tepeyong asoshi yua lir. Police-i aija alisang ana ya Srinagar nungi CBI nem bendanga agütsüogio aser Delhi-i anir aotsü.

"Mirwaiz tepsetba nung aija alirtem rongnung ano Abdullah Bangroo aser Abdul Rehman Shigan nabo 1990s nung security forces den khatapba mapang tepsetogo," ta special DG-i ashi.

Kashmir indang head priest Mirwaiz Farooq ya Hizbul Mujahideen nungi kiralongrartem tepseta liasü. Pa tepsetba sülen Nageen Police Station, Srinagar nung ken o ka benoka liasü. Iba sülen sorkari ken o ya 1990 küm June ita CBI nem agütsü.

Karnataka nung 'Talibanisation' tenzükogo: Nalin Kumar

Bengaluru, Monupii/May 16 (Agencies): Karnataka BJP tir Nalin Kumar Kateel-i Mongolbarnü ashiba agi, Congress-i Assembly election akokba sülen state nung 'Talibanisation' tenzükogo aser linük anema inyakertemi yimjung raksatsütsü asoshi nokdakar.

Dakshina Kannada nungi Lok Sabha züngsem yagi BJP züngsem Krishnappa'er kinungertem den ajurutepa liasü, shiba Deobarnü tepseta liasü. Bengaluru Rural district, Hoskote nung par kima puja bomb apokba atema ashishiba sülen pa zükset aser pa kinungtsü aser jabaso nata kanga mejungi yirua liasü.

Iba dak sendakba nung nisung ka puogo aser ano ken o dak sendaka alirtem aputsü asoshi bushidar.

"Talibanisation tenzükogo. Linük anema inyaksangshirtem nokdakar aser parnokki yimjung aser tesunep raksatsür. Congress-i iba amala nisung ajungketba ajanga iba ya ataloker. Anungji Congress nungi kecha tajung

mimlar," ta Kateel-i osangbenertem dang ashi.

Iba tatalokba aija, pai ashiba agi Karnataka ya 'mini-Bihar' kümdaktsütsü asoshi meranger.

"State nung tesempatep politics benoka inyaksangshidar. Iba ajanga iba sorkar yagi dang yimsüsüra kechi ataloktsü iba indang osang agütsür. Iba ya idaki 'jungle raj' ka amenoktsüba temaitsü lir," ta Kateel-i ashi.

"Onoki (BJP) iba ya aitsür aser iba anema nokdaksü. BJP kübok inyakertem kecha tsübutsü nungdak mali. Iba anema onoki raratsü aser telangzüba tapet agütsütsü. Onok ajemajema malitsü," ta paisa ashi.

Paisa, election result sangdongba sülen Yadgir, Shivamogga, Bhatkal aser tanga tesem kar nunga lendong atalokogo, ta ashi.

Taküm Karnataka assembly election nung Congress-i menden 224 nungi 135 koka BJP atsüngtokogo. Election nung BJP-i menden 66 aser Janata Dal (Secular)-i menden 19 koka liasü.



New Delhi kübok Kashmere Gate ISBT nungi India nung mezüngbuba all-women intercity bus tenzüksüba sülen tetsür bus anir aser conductor tem tangokba noksa nung angur.

Andhra Pradesh CM-i angopur lakh 1.2 nem senotsü teyari agütsü

New Delhi, Monupii/May 16 (Agencies): Andhra Pradesh sorkari Mongolbarnü 'YSR Matsyakara Bharosa' scheme kübok angopur kibong lakh 1.2 indang bank account nung sen crore 124 inoktsüogio.

April 15 nungi June 14 tashi ya anogo breeding season lir aser iba mapang parnok tzüyim-i anogo apui maoyer.

Küm shia anogo aputsü atema tenokdangba agütsür aliba mapang anogo entsü akotsü aser renloka aotsü asoshi minprong masütsü asoshi Andhra Pradesh nung angopurtem Bay of Bengal-i ango apui aotsü memelar.

"Tenokdangba agütsür aliba mapang anopur shirnok tzüyimi moteter, parnok timtem nungi jenboa toktsütsü asoshi onoki 'YSR Matsyakara Bharosa' tenzükogo," ta

beneficiaries tem nem government scheme lema agütsüba sülen Chief Minister Y S Jagan Mohan Reddy-i Bapatla district kübok Nizampatnam jila nung lokti senden ka nung o jembiba mapang ashi.

Kibongshia nem sen 10,000 agütsüba dak alia iba sentong kübok Konaseema district nung aliba angopur kibong 23,000 indang bank account nung Chief Minister-i sen crore 108 inoktsüogio, shirnok public sector unit ONGC-i pipeline mesangba ajanga anogoshi libaliro nung kongshiogio. Iba scheme ya taküm agi küm pongububa agütsüogio.

Tang tashi nung sorkari küm pongu tsüngda 'YSR Matsyakara Bharosa' scheme kübok kibongtem nem sen crore 538 agütsüogio.



West Bengal kübok East Midnapore district nung puja bomb yangluba factory ka nung lendong atalokba sülen nüburtem adenshir aliba noksa nung angur. Iba lendong nung nisung 6 asü.



TIR YIMYIM YIMOBILEM (EDITORIAL)

DIMAPUR RASEMNÜ, MONUPII(MAY) 17, 2023

Manipur agi asem akümtsü asü ?

Taküm May 3 nungi Manipur state lendenlen Meitie nungertem alidak parnok kin o kin na tsüngda lendong tulu adokba sülen Manipur yimtiba Imphal aser temeket nung Meitie nungertem dak alaka tenem kintem talisa Kuki nungertembo azüjang kata mali kümogo aser kasaji tenemlena Meitie nungertem kata mali oshizüka lendenleni luogo. Tesüngmangtsü, teratsü aser shisabolutsükaji Manipur nung police-tem rongnunga, talisa, Kuki nung o Meiti na tsüngdabo temulung melemtep tulu adoka lir. Aji oda, Kuki nung Manipur police-temi Meitie nung alidak mitkar mapa inyaktsü tsübur aser kasaji Meitie nung Manipur police-temia Kuki nung alidak tesemtem nung mitkar inyaktsü tsübur. Nübertem rongnung tsübutepba dang masü saka kasa state nung police-i police tsübur. Aji oda, police-i pei medemer police dak dena temulung malemtsüsaba tensa tia ka nung Manipur police lir. Iba ama Manipur state tensaji Manipur nung Kuki nung MLA teri India kilo kilonser Amit Shah nem agütsüba shiti nung shia angur. Atangji, alima nung kin o kin na tsüngda mangatettep adoker aser lendong timtem ataloker. Ajisüaka, tang Manipur nung atalokba lendong yabo kenyongi imlaa maliba aser asenok anasabo matalokdangba lendong tuluka atalokogo. Aji oda, tangari masü külem kiyong ka nung liasüba nisungtemi kiyonger tepsetba aser aser kidang kiyonger ki rongdoktsüba mapatemjibo Manipur nung telidak purtem rongnung atalokbo memesük. Ibai tamangba yimsü asoshi raraba tongpanga masü saka tenla kitem dena rongdoktsüsüba apusoba tebilemba aser nükjidongjibo kenyongi balaka aser tangatet dang, aji ajungbena atalokba mapa ka masü. Iba lendong ataloker tanü agi anogo hopta ana ajunger saka nübertem tetsüba tia nung lir. India nung sepai tesashi army-tem lir saka parnok alibaji nübertem asoshi tejenokdak aser mulung anisüngzükdak masü. Aji oda, anogo shia tesem balala nung police-tem amakba angashir. Joko, Manipur yimtiba nung Kuki nungertembo government mapa nung inyakertema kata mali jena omaogo aser meyipa aotsübaji tasüi aor amai bilemer. Iba kasa tetsübuji MLA teri Amit Shah nem agütsüba shiti nung shia lir. Joko, Manipur state ya lemdangadokogo, kechiyong Meitie nungertem kata tenem nung mali aser tenem nisung Kuki nungertem kata lendenlen mali. Parnok takaba ajak samaogo aser joko parnoki tanaben pei jena aruba tesem bushia aotsübo tebilema mebilemer. Joko, parnok ajakji tanüang alimai aru ama taküm aser kibong tasen tenzüksü. Iba ama tensa tia ka nung Kuki nung MLA teri akangba ama, tang ya Manipur nung Naga nung MLA-temia Manipur state yimten yimsüsüba kübok melii onoka balaka asütsü ta nokdaksübaji mapang shitak ka asütsü. NSCN-IM telok o India government na tsüngda yimjung yanglubaji Manipur state nung dena kecha arladanga melii (without territorial limits) alima ajak nung asütsü ta 2001 küm June 14 nü metetdaksüba maginü aser marem Manipur nung Meitie nungertemi anir Imphal nung government kiojen dena rongdokja anema apusoba anogo June 18 ya parnok asoshi nübertemi Manipur lima atema taküm bendanga agütsüba anogo ta züngshia küm shia amonger. Atangji, iba anogo nung yabo Kuki nungertem dena Meiti nungertem deni dena alitsü, kechiyong Naga nung o Kuki nung na tsüngda putepa mali asü. Ajisüaka, tang Manipur nung Meiti nungertemi Naga nung aser Kuki nung ama parnoka Sheduled Tribe asütsüla ta akangba anemabo Naga nung o Kuki nung na külem ser All Tribal Students' Union Manipur lenisüba nung longjemer nokdaker. Aji oda, Manipur nung aliba Naga nungertemi Manipur state küboksa alitsü tebilemba melira tang ya Kuki nung amaji ola adoktsüla. Narendra Modi lenisüba nung BJP teloki India nung yimsüsütsü tenzükter inyakba mapa tulutem rongnung tulutibaji Jammu & Kashmir state-bo India telongjem küboksa süaka temzüng balaka ser yimsüsüba arua liasüba temzüng mali kümtsür state agi Union Territory asem kuma lemsatsür, India government-i Naga yimten tebilemtsü ken o yaa tembangtsü nungbo long ka agi ozü asem onzükter asütsü.

OLEMSABANG

NAGA NUNGER YASHI, TANÜ ASER ASÜNG INDANG

~ B. Wati Jamir Arkong Ward, Mokochung.

(Yashi adok nungi...)

TANÜ NAGA LIMA TIA:

Yashi lima tia nung Naga nung koma lia aru asenoki nguogo. Süra parnoki alangzüka toktsüba lima nung tanü asenok alir koma alir reprangrandi. Yimden yimli den tamangba yimsü tajung "Khrista Yimsü" parnok ochi-tongmelang tamang agi alangzüka toktsüba nung tanü asenok alir. Süra par tejen putu nung aliba ama ochishia liteter meliteter reprangdangra tanü koba asenoki Khrista yimsü amanger ibai otsüla oboula nungeri amanga aruba yimsü ka masü, saka ibai America nung missionary ajanga Naga nung ajunga liromedema litettsüsa iba yimsü ya sayu. Oda tanü Naga lima nung tanga tamangba yimsüa kar angutsü akok, saka iba Khrista yimsü ya ang nisung teimbai amanger. Naga lima nung kin tapu balala aika lir aser item kin shiaji pei tamangba yimsü balala amanga pei yimli konang bushia liasü, aji süaka Khrista yimsü ya ajanga Naga kin ajunga longjema yimsü ka kübok liro medema litettsüsa yimsü ka aliba ya Tsüngremer tesüngmangtsü mapa lir.

Asen Naga limai America Missionary ajanga iba Khrista yimsü ya bener arutsü, ajisüaka parnoki pei limaji "Khrista asoshi" tabo ayongzüka mayu, saka asen Naga lima yabo KHRISTA ASOSHI ta ayongzükter tanü aliba lima ya yanglua lir. Anüolen aliba limatemi Naga limaji kanga bulua jembir, oagi tenem kin Khrista lima ka lir ta nübur ajungai jembir. Süra tanü asen lima ya Khrista lima ka ta jatettsü temsüa ali mali asenoki ken bilemdangdi. Oda reprangdangra asen lima ya Khristan lima ka ta ajatsübo metemsü kümogo. Teraksa agi asen lima süngogo. Ano külen bilemtsübo iba ama yimden nung teraksa ya asen lima yimden nung temelenshi ka ajanga alitsü. Kechiyong India temzüng kübok malidang otsüla oboula nung tongmelang aser ochishia yimsü süa aru, saka meilong-meilongi asen limai iba election (Indian election) ya arua Naga nung ajak meyokteper Salang (Assembly) ka yanglua iba nung tanishir (leader) nisung roker (sixty) shima iba nung jagi Naga nung ajak anishia yimsüsüba ya arur yimden nung teraksa jendi adokogo aser item teraksa yanglutsü asen Khristan tem teinyaktsü shilem tulu ka lir.

Item teraksaji asenoki reprangdangra kinük ajunga nung angutsü aser item rongnung tongtipang kaji "SÜBOKREM" aser "OCHIMASHI" (tiyazü) ajanga yimden nung teraksa adokba alitsü. Sübokrem aser ochi mashi ya kibong ka nung kinungtsu kinungbo (apuan) amai lir. Kechiyong kong sübokrem lir yangji ochi mashi anidaker aser kong ochi mashi lir, yangji sübokrem pokteter. Anungji asenoki yangi iba sübokrem ajanga koda teraksa adoker, khristan kati koda alitsüla temeshi Lai o kar ajanga bushidi. Kechiyong tanü asenok ya otsüla oboula nung ochi tamang senmangertem lir. Aser Khristan aikati iba nungi jenboa meliteter aser pei temeden yoka achir, iba ajanga shitakba nübur lenitsü yimsüsür ka shimtsü melena joko shibai sübokrem agütsür pa yaritsüsa akümer, aser sen tajung tangar talenba küboki air aser pei temeden mamshiteter. Ibai pei sasa alar tiai aiba den saku/kasa alitsü. Ano külen shibai sübokrem amshir, paia meteta tai maketer mashi/tai lenmangi idaktsür aser nübur atema inyaktsü melena sübokrem sentsüh tang aotsü meranger. Anungji yangi lenir aser nübur ajak tebilemtsü tulu lir.

Asenoki tejen lai nung reprangra Samuel kodang tambor aküm, pai pei chir obendanger kümdaktsü, saka parnoki ochi nungi pila-a sübokrem agi, anungji nübertemi parnok anema apuso. (I Samuel 8: 3), aji oda tanüa lenirtemi iba amaji inyakra nübertemi nenok anema apusotsü. Aser idangjibo yimden nung tesünep malitsü. Khristan kati sübokrem agibaji kanga dang temenen lir. A.Shin 17:23 nungj yamai shia angutsü, "ochiba lenmang meyipdakja, temenen nisungi teko nungi sübokrem agizükter" aji oda Khristan kati sübokrem nungi pila alitsüla. Lai o-i iba sübokrem atema yamai ashir, "Nai sübokrem magitsüla kechiaser sübokrem agi tenük pokdaksür. Aser ochishir o mashi-koshi kümdaktsür. (anitet 23: 8) Ano T. Ken 15: 5 nungji yamai angutsü, "shibai pei sen sentem magütsür mesüra tai makar anema sübokrem magir shibai itemi inyakdir kodanga marakzüksü." Ainkar Mikai Isreal nung temenenji yamai shia angutsü, tamajung inyaktsü nung toktoka parnok teka sotaka lir, tongtipur aser o bendangeri sübokrem akanger aser tamajung nisungi tamajung taginüba jembir (Mika 7:3) Koda Isaia ainker-i Yihuda aser Yerusalem indang mangdang angu, aji oda kasaji asen lima nung ataloka arur südi ta bilemer, kechiyong tanü asen lima yimsüsür kati ochishia yimsü asüba mangutsü, saka pei ajung asa-a pei rongsen bendentsü dak alaka nübertem timtemji kodanga merepranger. Tsüngremibo nisung ajak kasa yanglu aser kasa lidaktsüner aser ibaji lomudem (Democracy) lima nung lomudem im (democratic-norms) agi melaba lir, saka asen lenir-i aji kodanga meinyaker. Isaia 1: 23 nungji yamai shia angutsü, ne yimsüsürtemji anema apusortem kümogo aser auür medemer kümogo nisung shiai sempet meimer aser tajangzük sülen anidaker; parnoki tebu malir o mebendangtsür mesüra parnok dangi aruba amitsür asoshi ochi mapa meinyaker.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Blasphemy tai tonglokja alila Khristan tsür bail nung chiokogo

Lahore, Monupii/May 15 (Agencies): Pakistan nung aliba court kati tamangba yimsü mezüngmeshiba nung tai tonglokja alila Khristan tsür ka Honibarnü bail nung chiokogo, ta la okatsür temi ashi.

Lazar Allah Rakha-i Morning Star News dang ashiba agi, Arifwala Additional Sessions Judge, Ijaz Ahmad Phulwaran-i Musarrat Bibi aser ano la den külemi tai tonglokja alisang Muslim nung Muhammad Sarmad, tenaprong sen 100,000 (\$338) bond züluteper chioktsü May 12 (Hokulbar) nü mela.

"Mursarrat Bibi aser Muhammad Sarmad na anema First Information Report (FIR) ya anogo pezü menu rang benok ta ni ashishiba court-i agizük. Ajidang masü tai tonglokja alisang anaprong ya iba Muslim nungi temeshi kaket ya arongtsü tebilemba tamajung meliasü," ta Rakha-i Morning Star News dang ashi.

Bibi aser Sarmad nati azüngtsü aser zülutsü memetet aser school ketdangtsür temi la inyakba school nung storeroom müreksü ashiba ama inyaka liasü aser Sarmad ya atsü inyaker ka lir, ta ashi. Pakistan nung tamangba yimsü mezüngmeshi ta aitsütsü asoshi parnok tebilemba jangjatetsüla.

Arishi küm 45 tain Bibi aser Sarmad na dang April 15 nü Pakpattan District kübok Arifwala tehsil, 66-EB village nung aliba Government Girls Higher Secondary School indang storeroom müreksü ashi, kong kaket aser danga oset tamajung agi sünger liasü.

Mapa inyaker nisung ana yagi kaket tamajung tem school kinük külen benden aser mi senloktsü. Mapang tatsüka lir kaketshir kari Muslim nung temeshi kaket indang tekong kar nguteta liasü.

School principal Nasreen Saeed densema school staff temi Bibi aser Sarmad nati asaa iba kaket arong masü ta meteta lir, ta attorney Javed Sahotra-i ashi, shiba Bibi asoshi nokdaker. Tesayur aser kaketshir kari anema nokdakba principal aser dangar kari süngjemdaktsütsü merang.

Anogo pezü lir April 19 nü yangji aliba Muslim Kashif Nadeem-i police dang teyari meshi aser Khristan tsürlai tamangba yimsü mezüngmeshia school nung koranic pages tem arong, ta tai tongloktsü. Nadeem-i Bibi tenüng dang agütsü, saka police temi bushisüngdangba mapang mi senloktsüdang atsü inyaksang densema liasü ta

bushitet.

Nadeem-i school kima nisung telok ka aniden aser longkak ait tenzük aser police temi tensa tamajungba mekumdaktsütsü mechi Bibi aser Sarmad apu. Parnok blasphemy statutes indang Section 295-B kübok Pakpattan Jail-i obendanger ket nung ayutsü asoshi yoka liasü.

Section 295-B nungya "Shibai metetsümonga Koran atongsar, raksar mesüra copy shizüker mesüra yangji zülua aliba agiteta mezüngmeshia amshir mesüra ozüng alema inyakba nung amshir, parnok takum tepiyong tepuokdak ayutsü," ta shia lir.

Bibi'er jala asem lir, ana kibong kumogo aser tanutsüla ya arishi küm 14 tain aser tetsü den alir. Bibi kinungbo Barkat Masih ya kasa school nung tesayur ama inyaka liasü aser küm pongu tejakdang pa asüba sülen, iba keket reju yagi la ya sorkar indang service rules nung aliba ama office worker inyaktsü shim. Ano la ya school nung store tilaka lapoka lir.

Iba ken o yagi tajemzükba jenjang nung aliba nüburtem dak tai tongtsütsü asoshi tamangba yimsü mezüngmeshiba onük amshiba iba ken o ya ajanga sayur, ta Anglican Church of Pakistan Bishop Azad Marshall-i ashi. Sorkar dang iba ozüng ya mamshitsü ajungshiang ta takhangba agüjaka ketdangtsür temi blasphemy laws mashi lenmang nung amshiba menokdangteter, ta pai ashi.

"Tenaprong azüngtsü aser zülutsü memetet aser iba mapa ya asaa inyakba masü ta

jangjaka tamangba yimsü mezüngmeshi ta tai tonglokba apuba ya tesasatsüka lir. Tai tongloktsüba kisüng ya tepsettsü totuyuba agütsüba den tepila mali aser parnok kumzüktsü asoshi maneni sarasademer," ta Marshall-i Morning Star News dang ashi.

Tamangba yimsü tenüng nung Pakistan nung azüdokshi tali kumogo, ta pai ashi.

"Tiazü nung tamangba yimsü mezüngmeshiogo ta tai tongloktsüba ya yangi yimya ka ama kumogo. Tamangba yimsü dak tera yanger aliba linük nungya blasphemy statutes agientsü tamakoktsü asütsü ta angarteter, saka ozüng mashilen amshiba nokdangtsü asoshi sorkari mera agitsü mapang tongogo," ta pai ashi.

Pakistan nungya Muslim nung timba lir aser tamangba yimsü mezüngmeshi ta tai tongloktsüba ajanga aiben lokti adenshia azüdokshi asür. February ita ain adoka aliba nisung telok ka Nankana Sahib District nung aliba police station kati ait aser tamangba yimsü mezüngmeshi ta tai tonglokja pua alir nisung ka anizüker oa tepseta liasü.

Priyantha Diyawadanage ta sür Sri Lanka nung ka Sialkot yimti nung factory manager ama inyaka liasü saka December 2021 nung tamangba yimsü mezüngmeshi ta tai tonglokja zükset aser temang nung mi senlokja liasü.

Open Doors ajanga alima nung Khristan ka alitsü asoshi tamajungtiba linük 50 asadanga 2023 World Watch List nung Pakistan ya jenjang tenet buba nung lir, koba taoba küm jenjang ti buba nung liasü.

ANO GO ABEN TSÜNGREM DEN

Tüozük Chiyongtsü T.Ken 104: 14-18

Tsüngrem teyanglubai ken zülur pua liasü. Atangji parnok aliba limaji temerükba aser mejanaba, aser tobur tajungba sür alitsü akok, kechiaser nisungi ano aji meraksai liasü. Parnok taküm alitsü asoshi Pa dak mataloker alitsü parnoki angazüka liasü. "Kiset shiruru telok asoshi aser nisung tenzükba shiruru asoshi chiyongtsü adokdaktsütsü asoshi: aser yi agi nisung mulungjang peladaktsütsü, aser Pa tejak pranga kümdaktsütsü totzü, aser nisung mulungjang tashi itdaktsütsü amtsük" (t.14,15).

Iba mapang chi, yi, totzü aser amtsük- itemji Yihuda nung chiyongtsü liasü. Ken züluri yi ajemba indang jembibaji mesepa ajemba indang jembir ta tebilem. Laishibai yi agi memeseptsü tekümdangtsü agütsür. Pai shinübaji Tsüngremi asen temang nungdak agütsür, aser talia agütsür. "Shirnok akümüli nung takar..., shibai kechisarena asenok nem peria agitsü ajak agütsür, pa dak yimlatsü melaang" (1 Tim.6:17).

Laishiba yi ji Tanela Temeshi noksa lir. Pentecost mapang nung kodang nisungtemi pelatep aser Tsüngrem aser Kibuba tenüng asang, lokti ashi, "Parnok yi lanu agi mesep" (T.M. 2:13). Na tanü Tanela Temeshi tepelaji kar ma? "Yiagi temesep," ta Pauli ashi, "saka Tanela Temeshi agi sünga liang" (Ef. 5:18).

Totzüji Tanela Temeshi noksa, shibai tejak sentsüpranga kümdaktsür. Mosa sentsüprang tejak dena liasü kechi pai Tsüngrem den lungjema ali. Stepen tejak sentsüpranga liasü kechiaser pai Tsüngrem nem bendanga agütsü. Sentsü Melenba Tenem nung Yisu tejak sentsüpranga liasü.

Amtsükji Tsüngrem O noksa lir. Iba yagi temulungjang tashi itdaktsür. "Nisungi am tesa agi taküm malir, saka Tsüngrem bang nungi adokba O shia agi alir" (Lk. 4:4).

Tsüngremi ne nem tepela agütsüner; Pai ne nem tesangwa agütsüner; aser Pai nem nem tashi agütsüner. Tanela Temeshi Tsüngrem chirtem Yisu mesüka tali kümdaktsütsü asoshi Tsüngrem O ji amshir.

Nai Tsüngremi agütsüba tanela chiyongtsüji shidak chidagi ma? Chiyongtsü, yi, totzü, amtsükji Pai na koda mesür iba temaitsüji lir. Pa O agi mesüang aser Tanela Temeshi ne taküm azüokdakjang.

Cyclone Mocha agi kongshir aliba Bangladesh nung arogo balalai teyari agütsür

Dhaka, Monupii/May 16 (Agencies): Cyclone agi kongshir aliba Bangladesh linük nung arogo tentet balala aser international agency temi teyari osettem bener nungtepa ogo.

Bangladesh indang disaster management and relief ministry ajanga ashiba agi, nisung aliba ki 13,000 raksatsüogo aser item ya timba southeastern Cox's Bazar district nung alitsü, kong mopung ghonda ka nung kilometre 215 tashi kera aonba cyclone agi kongshi. May 14 nü anjongmeshi mapang iba yipru yagi linük nung mekongshidang nisung 4,00,000 dak tema ketdangtsür temi anizüker orr liasü.

Papal charity Caritas Bangladesh ajanga ki raksar aliba yanglushiba nung yariteptsü atema telok ka yoka lir.

"Sorkari anir teyari

agütsüba aser ki o jen yanglushitsüba maparen nung onoki shilem agir," ta Chattogram region nung Caritas Bangladesh indang maparen anir inyaksang Marcel Ratan Guda-i ashi.

Kanga sashia kongshiba Saint Martin asetkong nung akhi mapang ama nüburtem melitetsüsa akum. Iba asetkong ya Bangladesh southeast tsütsü tatembangba tesem Teknaf nungi kilometre 10 shi pilar lir.

Iba asetkong nung nisung 10,000 shi alir aser yangji Cyclone Mocha ya ghonda trok shi aita alidang ki shilem 80 shi raksatsü.

"Bay of Bengal tang tashi senzüsempongtsü majung aser Saint Martin asetkong den osangtsüsang agiteptsü makoker," ta Guda-i ashi.

Plastic aser süngkum agi

yangluba ki yipru ait tenzük minute ishika tsüngta ponger ao, anungji nisung aika meyipa shilanger anisüngzüktsü maka kumogo.

"Ni küm aika agia tanem-tanemi yangluba takum iba yipru agi shisatsüogo. Ano ni tetenzük nungi kü takum tenzükshitsüsa akumtsü," ta three-wheeler rickshaw-van atsür jajar aser Konapara yimtsüng nung alir arishi küm 35 tain Zakir Hossain-i ashi.

Meyi mapang tenzüktsü lia Saint Martin asetkong teraksa jenjang nung yutsür. Iba mapang tourist temi asetkong ya mesemdanger, koba June 1 nungi tenzük.

"Kü ki yanglushitsü atema sen taka 70,000 (\$ 649.16) shi nungdaktsü," ta Hossain kidanger arishi küm 61 tain Abu Tayeb-i ashi.

Tayeba ya Islamic

seminary ka nung tesayur mapa inyaka liasü, saka küm aika tejakdang mapa nungi anen aser sen lenmang balaka mali. Khen-khen asürtem asoshi taa agütsür sarasademtsütsü ajar.

Ki raksatsüba ya Cox's Bazar nung aliba Rohingya refugee tem indang ki 1,300 densema lir.

Cyclone agi kongshir alirtem atema Bangladesh Red Crescent Society ajanga sen taka million 30 lemzüktsüogo aser ano tekeraba nung emergency fund sen taka million 80 bushitsü telemtetba agi.

"Asen volunteers tem oagi takoksa aser teraksa ajurur alirtem den yariteper," ta International Federation of Red Cross aser Red Crescent Societies tekolakba Sanjeev Kumar Kafley-i sangdong ka nung ashi.

AO OSHI ANGAZÜKDAK: TANÜ ANGAZÜKTSÜBA OJANG



Putep

(adj) meimtep, jungtep (harmonious)

* Arogo purtem kanga putepa ali.

Putepdaksü

(n) jungtepdaksü, yimjung yanglutsü (reconciliation)

* FNR teloki Naga nunger putepdaksü.

OLONG PAITEP # 6517

Grid for crossword puzzle #6517 with numbered squares.

TIPIEN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T _ _ _ lu - (3)
10. Takdang temalen - (9)
11. Tesa _ _ _ a - (3)
13. Ajungbena temulungjang tonglonsütu - (5)
15. Tejen lai nung tesayur - (5)
16. Tsünsak-mopung - (5)

LANGTSÜNGLEN

- 1. Reprangdaksü - (4)
2. _ _ _ ur - (3)
4. Kiojen yangludak - (6)
6. _ _ _ _ _ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemtdak - (6)
12. _ _ _ _ adenshi - (4)
14. Tsünüsenbongtsü adokdak - (3)

OLONG PAITEP # 6516 TELANGZÜBA


TIPIEN :

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN :

- 1. Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.

Agüja aliba noksa nung meputepi aliba 10 bushiang



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Sikkim indang 48 buba Statehood Day among



Gangtok, May 16, 2023(Agencies): May 16 nü Sikkim indang 48 buba Statehood Day among. Iba sentong ya Chintan Bhawan, Gangtok nung agi.

Sentong nung Sikkim Governor Lakshman Prasad Acharya aser Chief Minister Prem Singh Golay na den minister tem aser tongti ketdangsürtem aden.

Lhendup Dorjee Khangsarpa lenisüba kübok May 16, 1975 nü Sikkim ya Indian Union nung state 22 buba aküm.

Sikkim nung mezüngbuba Chief Minister Lhendup Dorjee Khangsarpa-i tesüiba Chogyal Kingdom nungi democracy bener aru.

Chintan Bhawan kima nung

LD Kazi indang kürakyanglu nung naro enoktsüba sülen benjung tenzüik.

"Sikkim nung mezüngbuba CM LD Kazi nungi ni trokbuba tashi Chief Minister ajak, MLA tem, minister tem aser MP temi Sikkim ya democracy ka ama renlokba nung shilem agia arur" ta Sikkim Chief Minister Prem Singh Golay-i ashi.

Taruba küm ana tsüngda asenok statehood ngur küm 50 benjung amongtsü. Tesüiba nung Sikkim democracy atema rarar ajak dang kanga pelar, ta pai ashi.

"Sikkimese nunger dang nangzüikba ajak onoki inyaka arur. Nisung aikati onoki Sikkim nung kecha meinyaker ama bilemer aser social media o media osangtem nung onok dak

tai tongloksür. Saka tesüiba küm pezü tsüngda Sikkim indang revenue 57% agi teimba kümogo, senotsü aoba ajak sorkari noktango" ta pai ashi.

Sikkim ya democracy nung lanur ka süaka tesüiba küm 48 tsüngda state ka ama mapa tajung aika inyaktetogo. State sorkar indang tongtipangtiba mapaji national security lir. Tanü Sikkim indang jenjang ya teamwork ajanga atongba lir aser tejakleni aotsü atema telongjem nüngdaker. Centre nung lennirtem dang mashidang tamasa asenoki terenlok indang kuli jangjatsüla. Sikkim nung agriculture ajanga revenue kanga ngua liasü saka tangbo balaka mangur kechiyong nisungtemi agriculture nungi pilaogo" ta CM Golay-isa ashi.

Assam police nung teyirartem sodi agütsütsü

Guwahati, May 16, 2023 (Agencies): Assam nung police ajak fitness survey ka asütsü aser meshitak putetertem nem Voluntary Retirement (VRS) agütsütsü ta Assam Director General of Police (DGP) GP Singh-i Mongulbarnü metetdaksüogo.

Iba nung Indian Police Service (IPS) aser Assam Police Service (APS) ketdangsür ajak dena lir" ta pai ashi.

"CM Office Assam-i tuyuba ama Assam Police Hq-i Assam Police personnel ajak indang Body Mass Index (BMI) tendangtsü lemtetogo" ta DGP Singh-i metetdaksü.

"Onoki IPS aser APS ketdangsür ajak dena Assam Police personnel nem ita asem agütsütsü asr ibaji August 15 tashi asütsü. Iba sülen taruba anogo terpungu nung BMI assessment tenzüiksü" ta pai ashi.

"Teyira (BMI 30+) category nung adener ajak temang seret touzüik ajemtsü atema ita asem (November tashi) agütsütsü aser iba sülen hypothyroidism amala medical kuli tejangja alir dak alaka VRS agütsütsü" ta DGP Singh-isa metetdaksü.

August 16 nü DGP Assam Police-i mezüng BMI agütsü ta paisa ashi.

Assam Police 300 shi ka

mapang shia yi ajemertem lir aser parnok Voluntary Retirement (VRS) asütsü ta April 30, 2023 nü Assam Chief Minister Dr Himanta Biswa Sarma-i shia liasü.

Item police yagi yi kanga ajemer aser iba ajanga mapa inyaksangshi nung kongshir ta CM Sarma-i ashi.

Item amala police asoshi VRS maparen tenzüikogo aser mapa tazüngtem nung nübotem shimoktsü, ta paisa metetdaksü.

Chief Minister Sarma-isa DGP dang police mapa inyaksü metemsürtem agientsü aser state police tajungba akümtsü atema metetdaksü. Assam Police nung tang nübo 70,000 shi lir.

Manipur kübok Chandel district nung aayanger 110 anien



Imphal, May 16, 2023 (Agencies): Manipur nung Pradhan Mantri Gram Sadak Yojana (PMGSY) indang mapa inyaker nisung 110 tashi Phaisanjang nungi tayimtsü ajanga anir ao.

Chandel district kübok Indo-Myanmar arrtsü anasa nungi parnok kümzüik.

Manipur state home department-i 28 Sector, Assam Rifles, Kakching, District Administration Chandel, District

Police Chandel aser District Administration Kakching nunger den yaritepa mapa inyakerem ya BSF helicopter ka nung anir ao.

Helicopter nung shilem pezü lemsar Khengjoi subdivision kübok Phaisanjang nungi aayanger nisung 110 anir ao ta osang ajanga ashi.

Manipur nung tensa mejungi akümba sülen aayanger ya Chandel district nungi moutet liasü. Chandel nung meta talang pilar alidak asüba agi parnok ya

tsüngsang majungba ajanga anir moutet.

Parnok anienba mapang DC Chandel Mayanglambam Rajkumar, SP Chandel PH Mahesh Narain, ADC Chandel MD Firoj Khan aser SDO Kakching Okram Sandhyarani Devi nunger liasü.

Manipur nung kin o kin tsüngda mepetmesü adoka raradang nisung 70 taküm samaogo aser kiojen meyirjang aika raksatsüogo.



May 16, 2023 : Bangladesh kübok Saint Martin asetkong nung Cyclone Mocha agi ki o jen raksatsür alidang nürtemi pei oset bushiba noksa nung angur. Cyclone Mocha yagi Bangladesh nung Cox's Bazar ajanga aotsü takzua liasü, saka iba yipru lenmang melenshia ao. Iba tesem nungi ketdangsürtemi nisung meyirijang aika anizüker ogo.

Sudan nung Army aser paramilitary na asendenshir raradar

Khartoum, Monupii/May 16 (Agencies): Paramilitary-i tongtibang base tem atsünga aruba nokdangtsü merangba mapang Mongolbarnü asendenshir Sudan yimtiba nung tayimtsü aser artillery amshia telok ana tsünga kanga mejungi raraogo.

Khartoum anüolentiplen tayimtsü ajanga bomb pokloksüba, aser telok ana tsünga tesem aika nung khatepba angashiogo aser iba den kidanger yimti Bahri aser Omdurman nunga Nile ayong adener bomb aika pokloksüogo, ta tenük kuli agütsürtemi ashi.

Army aser paramilitary Rapid Support Forces (RSF) na tsünga raratepba ajanga Sudan nung tanga tesem aika mesüngjemeti kümogo aser talisa Darfur nunga tensa mejungi lir, ajisiüka rara ya Khartoum teyongtsü ser raradar.

Rara ajanga Sudan telung nung nisung 700,000 dak tema pei talidak ki toktsür jenshiogo aser iba den nisung 200,000 shi kidanger linüki jenshiaogo.

Linük yimtiba toktsür maortem taküm liyonga aotsü asoshi kanga saka kümogo, kechiyong chiyongtsü agi kanga anünger aser iba den health services chirepogo aser yimti nung ozüng kecha makai kümogo.

Tang tashi nung nisung 676 asüba aser nisung 5,500 yiruba

ketdangsürtemi mangaoka lir, saka rara nung asürtem iba dang nungi kanga agi timba asütsü ta bilemer, kechiyong yimtong nung tasü mang mepidaka aliba indang osang aika angazüker aser tasü mangtem aremstü asoshi nürtem timtemtepa arudar.

"Tensa kanga majung. Khartoum nung onok ki toktsür kidanger kidangi ao, ajisiüka onok koloni odir oaka idangji bomb pokloksür," ta yimti nung alir arishi küm 32 tain Ayman Hassan-i ashi.

"Ki yongtsü nung rara adoktsüsa lisopurtemi kechi tai inyaka ali aji mangatetter," ta paisa shisem.

Hopta ka tejakdang Saudi Arabia aser United States na teyongtsü ia Jeddah nung telok ana tsünga sensaksem tenzüka sülen Khartoum aser West Darfur yimtiba Geneina nung ano taliang raradar.

Sensaksem ajanga teyari balala asoshi lenmang lapoktsütsü aser civilian tem kümzüka ayutsü atemabo lenmang kar lapokogo, ajisiüka humanitarian corridors amenoktsü atema inyakyim aser ceasefire atema mulungteptsü asoshi tang tashi sensaksem dar.

Telok anaprongla taoba mapang ceasefires benokba sangdongogo, saka iba ajanga rara menokdangteti arudar.

Army-i tayimtsü aser artillery amshia tesem balala

amakba dak metaloker arudar aser ali nungbo aiben merarar. April 15 nü rara tenzüka sülen RSF sepaitem Khartoum kübok tesem balala nung amendaker lir aser tang parnok mintoktsü atema army-i kanga meranga arudar.

RSF-i Mongolbarnü northern Omdurman aser southern Khartoum nung tongtibang military base tem makogo. Army-i prangbong tulu aser fighter jet tem amshiba nokdangtsü atema parnoki item tesemtem amaker, ta iba tesem nung alirtemi ashi.

Kasa mapang nung RSF-i sangdong ka ajanga ashiba agi, parnoki Bahri amakba mapang army aika puogo. Parnokisa uniform semer aliba nisungtem tarensena mener aliba meketa RSF sepaitem benjungtepba video dena lemsatepogo.

Army-i tang linük yimtiba tema nungi RSF supply lenmangtem tem raksatsütsü merangdar aser iba den central Khartoum nung airport aser Bahri nung Al-Jaili oil refinery kümzüka ayutsü merangdar. Bahri nung Mongolbarnüa telok ana tsünga raratepa liasü.

RSF ya Army den lokteptsü atema sentong yangluba sülen mangatetter tenzüka liasü.

2019 küm taoba lenir Omar al-Bashir atsüngtokba sülen Army chief General Abdel Fattah al-Burhan aser RSF commander Mohamed Hamdan Dagalo na ya Sudan ruling council nung temaba mendeni atu.

Sudan nungertem timba Egypt aser Chad-i jenaogo. Kasa mapang nung tangartem Saudi Arabia aotsü asoshi timla nung temerem tzüiyim nung Port Sudan-i jenaogo.

Sür küm 1 ajungba menungra bilemteter



ASO: 14th Aug 1958

ASÜ: 17th May 2022

Asür Imlitemjen (Kangtsüng)

Iba akümlir wadang nungi nai onok toktsür orr küm ka ajungdang onoki na menungra bilemteter. Aji oda süaka nü shisatsü tajung, temeim aser mapa tajungtem na taküm ali medem onok mulungjang nung teti lir. Khrista nung asürtem ajak sentsüwangshi nung tanaben shia arutsü ta amanga onok mulung süngzüker.

Tanü iba anogomong nung onoki na bilemteta sarasadema amonger.

Temeim Kinungtsü, Chirnur, Anükapang, Semchirtem aser Kinungertem.

TEPELA TASOBA ANOGO LEMSATEPER



Tasoba Anogo: 17 May 1930

Temeim ojala **Mrs. Chubamongla Mongsenyimti** (D/o Late Sakumeri), iba alimai arur arishi küm 93 tashi abensa onok asoshi tanüla aser alishi nung akhümdong aser len sayur ka ama litettsüsa tanü tashi arishia yutsü nung Tsüngrem tenüng asanger. Maneni ojala nem arishi anogo den anema aliba taküm moajangma ta sarasademtsür.

Oja, onoki na kanga meimer aser ne temeim asoshi kanga pelar.

Temeim Chirnur & Semchirtem

OFFICE OF THE WATSÜ UNIT UNGER
B.P.O. UNGER, P.O. CHUCHUYIMLANG - 798614.
DIST: MOKOKCHUNG, NAGALAND.
KONANG TETUSHI AGÜTSÜR



Dr. Latonglila Jamir
 D/o. Lt. Chubanungba Jamir, lai Nagaland University kübok Environmental Science department nung Associate Professor jenjang tajung ngutetba takok tulu asoshi Watsü Unit Unger-i la nem konang nüngsang tulu agütsür.

Tsüngremi ano maneni la taküm aser mapa nung moajangma.

Sd/- Masainla
President, Watsü Unit Unger.

ALI TAYOKTSÜ LIR

Two Half pura per sq.ft. Rs. 25, From Commanding Junction 5 Minutes. Slightly negotiable
Contact : 9863826159

MULUNGNEN O



ASO : 1934 ~ ASÜ : 09/05/2023

Ozü temeim tsürabur obala aser obula asür **Onenkaba Jamir** (Chuchuyimlang) akümlir wadang tempanger onok mulung kanga kurema mangyima tako marok ajemba mapang shirnokisa ozü den asüko lemsatepa ozü molung sünepja khuret lemsatepogo, nenok ajak dang Tsüngrem tenüng sanga kanga pelaba lemsateper.

Pa temang nung tashi mait timtema aliba mapang nungi taküm tempanger, ozü lepkumong mapang tashi, ozü dang aria bilema rongsen, shisatsü, nübo aser tongtipangsa sarasadem ajanga yariteper kija, kibong, tembartem, kiyongertem aser temeimertem kwikati ozü yariogo, nenok ajak dang ozü mulungnen O lemsateper. Tsüngrem tulusangi nenok ajak talubosa moajangma.

~ Temeim kinungtsü, jala jabasotem, semchirtem aser kinungertem.



GOVERNMENT OF NAGALAND
DIRECTORATE OF TECHNICAL EDUCATION
 Nagaland : Kohima - 797 004

0370-2270409
 0370-2271432

NO.DTE/SCTE/6/2020-21/

Dated, Kohima, the 16th May, 2023

NOTIFICATION

Provisional result of DEE-2023 for undergoing 3 year Diploma courses within the state run Polytechnics along with the merit list has been declared and uploaded in the Department website www.dtenagaland.org.in & the office notice board.

The selected candidates are hereby informed to submit their acceptance/refusal letter to the Office on or before 25th May, 2023 through hard copy to office or email: sctenagaland@gmail.com only. In the event of any candidate fails to submit his/her acceptance letter, their selection shall stand cancelled. Candidates who did not make into the selection list may re-apply for Diploma seats in prescribed application forms available in the office.

Nomination letter shall be issued w.e.f 1st June, 2023

Sd/- (Er. VIPULHOU LHOUNGU)
Director

FIH Pro League: Europe Leg atema India team sangdongogo

Monupii/May 16, 2023

(Agencies): Drag-flicker Harmanpreet Singh lenisüba nung India team FIH Hockey Pro League, Europe leg asayatsü, koba tawa shimba coach Craig Fulton atema mezüngbuba mapa asütsü.

Taoba leg nung India team World Champions Germany aser Australia na den asaya aser asaya ka nung danga tamakok mongui point table nung parnok temaba jenjang nung liasü.

Europe nung parnoki maneni kanga junga asayatsü merangtsü, kong India team Belgium aser Great Britain den London nung asayatsü aser iba sülen Netherlands aser Argentina den Eindhoven, Netherlands nung asayatsü.

Hombarnü sangdongba asayar 24 rongnung goalkeeper Krishan Bahadur Pathak densema lir. Pa kibong akümba ajanga India nung asayaba mapang masayateti liasü.

Pa den PR Sreejesh-a shimogo aser defender tem rongnung penalty corner specialists Harmanpreet, Amit Rohidas, Jarmanpreet Singh, Sanjay aser Mandeep Mor nung densema lir.

Manpreet Singh shiba India team midfield nung kanga tongtibang asayar ka liasü, pa position tasen ka nung asaya-a Sumit aser Gurinder Singh na den back-line nung asayaba angutsü.

Midfield ya vice-captain Hardik Singh lenisüba nung asayatsü aser pa den Dilpreet Singh, Moirangthem Rabichandra Singh, Shamsher Singh, Akashdeep Singh aser Vivek Sagar Prasad nung shimogo.

Kasa mapang nung forward asayatem rongnung Simranjeet Singh Abhishek, Lalit Kumar Upadhyay, S Karthi, Gurjant Singh, Sukhjeet Singh, Raj Kumar Pal aser Mandeep Singh nung densema lir.

"Iba asayamung ya temaba jenjang nung aliba team tem den toktepa onok asayaba yimya tajungba küma aotsü atema onok asoshi maongka tajung ka asütsü. Asayamung atema yongya atar aser pro league tournament nung takok tajung angutsü imla atar," ta Fulton-ashi.

SQUAD:

Goalkeepers: Krishan Bahadur Pathak, PR Sreejesh.

Defenders: Harmanpreet Singh (C), Amit Rohidas, Jarmanpreet Singh, Manpreet Singh, Sumit, Sanjay, Mandeep Mor, Gurinder Singh.

Midfielders: Hardik Singh (VC), Dilpreet Singh, Moirangthem Rabichandra Singh, Shamsher Singh, Akashdeep Singh, Vivek Sagar Prasad.

Forwards: Abhishek, Lalit Kumar Upadhyay, S Karthi, Gurjant Singh, Sukhjeet Singh, Raj Kumar Pal, Mandeep Singh, Simranjeet Singh.



Dimapur, May 16: State Girls Sports Academy Dimapur nungi tetsür Sepaktakraw asayar (tabelen nungi) Rukuvinu Tsukru, Seyiekhrieno Tapa, Akumtila aser Sezovelu Dozo nung taruba 19buba Asian Games 2023 atema Goa nung National Coaching Camp asoshi shimogo.

Jofra Archer Ashes nung shilem magitetsü



London, Monupii/May 16

(Agencies): England fast bowler Jofra Archer Australia den asayatsü aliba Ashes series nung masayadaksütsü asoshi Mongolbarnü telemtetba agiogo aser kasa mapang nung Jonny Bairstow temang anema akümba sülen Ireland den taruba ita Test asaya ka asayatsü aliba team nung züngoksemogo.

Archer shiba lemluwa tepeyong masayatetsü, pa

tekatsüla aser teberem yiruba ajanga ita 17 tashi masayateti liasü aser January ita nungi tenzüka asaya.

Arishi küm 28 tain asayar ya Mumbai Indians nungi tang asaya aliba Indian Premier League (IPL) nung asaya pongu nung asaya ajisüaka yiruba ajanga masayatetsüsa aküm.

"Jofra Archer atema tezüdangtsü mapang ka lir," ta England men's cricket managing director

Rob Key-i ashi.

"Pa tekatsüla meyrushi tsüngda kanga junga renloka oya liasü. Pa yakta taneptsü ngua England team nungi asayatsü imla atar," ta pai ashi.

Kasa mapang nung Bairstow September ita yiruba sülen tang team nung züngoksemogo. Pa yiruba ajanga Australia nung T20 World Cup nung shilem magitet.

Ireland den June 1 nungi tenzüka Lord nung asayatsü aliba Test asaya atema Wicketkeeper Ben Foakes melen Bairstow shimogo.

"Team nungi Ben Foakes toktsütsü atema telemtetba agitsü kanga tasak liasü," ta Key-i ashi.

"Pai taoba küm England team atema kanga junga asayaogo ajisüaka Jonny Bairstow ya alima nung asayar tajungtiba rongnung ka lir," ta pasia shisem.

Warwickshire seamer Chris Woakes-a 2022 küm March ita sülen tang mezüngbuba Test team nung züngoksemogo aser Durham fast bowler Mark Wood-a team nung lir.

Captain Ben Stokes (left knee) aser seamer James Anderson (groin) nata tawa yirua liasü ajisüaka kanga mejungibo miyiruba ajanga tenaprongla team nung züngoksema lir.

Australia den Ashes series ya Edgbaston nung June 16 nungi tenzüka asayatsü.

England squad: Ben Stokes (captain), James Anderson, Jonathan Bairstow, Stuart Broad, Harry Brook, Zak Crawley, Ben Duckett, Dan Lawrence, Jack Leach, Ollie Pope, Matthew Potts, Ollie Robinson, Joe Root, Chris Woakes, Mark Wood.

HS Prannoy World no. 7 asayar kümogo

Monupii/May 16, 2023

(Agencies): India nung nungtugu asayar HS Prannoy, Mongolbarnü sayaba BWF ranking nung tebur kija asaya nung tenetbubai tuogo, koba pa indang career nung tang tashi nung ranking tajungtiba asütsü.

Commonwealth Games bronze medallists Treesa Jolly aser Gayatri Gopichand nata tetsür tarep asaya nung jenjang ana tejakdangi tu tang 15buba nung lir.

Prannoy-i asayamung 17 nung rating point 66,147 nguteta lir aser pa India nung kija asayatem rongnungi ajak dang jenjang tajungtiba nung lir aser pa sülen Olympic nung medal ana tashi ngur alila PV Sindhu lir, shiba jenjang ka tejakdangi tua tang 11buba nung lir.

India nung kija asayatem

rongnung Lakshya Sen aser Kidambi Srikanth na jenjang melentepa tang tena 22 aser 23buba nung lir.

Kasa mapang nung tebur tarep asayar Satwiksairaj Rankireddy aser Chirag Shetty na jenjang ana asepzüka luogo aser tang tenetbuba nung lir.

Iba dak alia India nung asayatem rongnung ka danga top 20 nung mali.

Teburtem top 10 list:

1. Axelsen Viktor
2. Ginting Anthony Sinisuka
3. Naraoka Kodai
4. Loh Kean Yew
5. Chou Tien Chen
6. Christie Jonatan
7. Prannoy H. S.
8. Lee Zii Jia
9. Vitidsarn Kunlavut
10. Shi Yu Qi.

Senior Men's Inter-District Tournament ayonger

Dimapur, Monupii/May 16

(TYO): Nagaland Cricket Association-i ayongzükbba Senior Men's Inter-District Tournament, May 22 nü nung tenzüksü. Iba asayamung ya Nagaland Cricket Stadium aser Sovima Cricket Ground nung asayatsü.

Cricket asaya meimertemi iba asayamung ya pei kidang nungi reprangtetsü, kechiyong asaya ajak Nagaland Cricket Association YouTube channel nung sayutsü. Nagaland Cricket Stadium nung asaya ajak CricHeroes team-i cover asütsü.

Italian Open: Djokovic quarter finals-i iogo; Alcaraz tsükogo



Monupii/May 16, 2023

(Agencies): Mongolbarnü Italian Open tebur kija asaya nung Novak Djokovic-i 6-3, 6-4 agi Cameron Norrie koka küm 17buba atonga iba asayamung quarterfinals-i iogo.

Foro Italico nung tang agi iba asaya tenepbuba akoktsü meranga asayaba mapang Djokovic-i tetenzük nungi kanga junga asaya-a iba asaya akok. Pa asayamung tetenzüklenbo junga masayateti liasü.

Asaya nung Djokovic-i Norrie dang nungi unforced errors (14-29) ishiba mena aser winners bo ana (21-19) agi timba nguteta liasü.

Norrie-i taküm küm tetenzüklen Rio de Janeiro nung Carlos Alcaraz koka clay nung

asayamung kabo koker lir.

Djokovic temaba jenjang nung aliba Alcaraz-i ajatetogo aser iba tetezü pa French Open nung No. 2 seeded asayar asütsü.

Djokovic taruba asaya Holger Rune mesüra Australian qualifier Alexei Popyrin den asayatsü.

Kasa asayamung nung Carlos Alcaraz tasembuba round nung Hungary nung qualifier Fabian Marozsan-i 6-3 7-6(4) agi kokogo.

Arishi küm 20 tain asayar ya Barcelona aser Madrid na nung takok anguba sülen iba asayamung nung asayai aru aser pai Novak Djokovic ajateta No1 asayar kümogo.

Ajisüaka iba asaya nung Alcaraz-i junga masayatet aser game pezübuba nung pa indang serve break südakja Marozsan-i mezüngbuba set ayong ayonga akok.

Tanabuba set nung Marozsan-i maneni Alcaraz nongshia asaya aser serve ka break süa 4-3 agi tejakdang aküm aser asaya akok.

Alcaraz ya taküm clay nung asaya 22 tashi khen danga tamakok mongui asaya aliba tang Marozsan-i kokogo.

BILEMDANGANG

"Nisung ajak meimang, kar dak temulung lemag, shinga anema teinyak."